

Lenflasyon e pri lavi

Lenflasyon i en logmantasyon zeneral dan nivo pri marsandiz e servis dan en lekonomi pandan en serten letan. Alors, ler nivo pri i ogmante zeneralman avek sak rounpi ou kapab aste mwens keksoz, sa i vedir ki ou pouvwar lasa inn redwir. En fason pli komen pou mezir to lenflasyon i sa sanzman dan poursantaz (%) en lendeks pri zeneral pandan en serten peryod - normalman sa i lendikater pou pri konsonmasyon (CPI).

CPI i ganny kalkile an prenan en pannyen komodite e servis ki ganny servi kot en lakour tipik. Sa bann keksoz dan sa pannyen e zot proporsyon i ganny determinen an rezilta en resansman menaz pou determin an mwayen lakantite komodite e servis ki en lakour ou konsomater i depanse. Isi Sesel dan pannyen CPI i annan marsandiz e servis parey pwason, lezot nouritir e lezot keksoz apar manze. Sa bann lezot keksoz i enkli marsandiz, parey lenz - e servis - parey rekreasyon e kominikasyon. Sa pannyen CPI i devret annan pri tou marsandiz e servis ki ganny aste par en konsomater tipik oubyen en lakour tipik. Diferan marsandiz e servis i ganny donnen diferan pwa - par egzanp isi Sesel, pwason i annan en pwa 3.3%, tou lezot manze i annan en pwa 25.5% e lezot keksoz apar manze i annan en pwa 71.1%. Sa i vedir ki si pri pwason i ogmante par 0.9%, lezot nouritir i bese par 0.1% e lezot keksoz apar manze i ogmante par 0.4%. - sa i reprezant sanzman an gro dan CPI – ki reprezant to lenflasyon – ki 0.3%. I enportan pou konpran ki to lenflasyon i ganny afekte par sanzman dan pri sak marsandiz dan sa pannyen me sa i depan lo pwa sak sa bann marsandiz e servis.

Parey inn ganny mansyonnen avan, en logmantasyon zeneral dan nivo pri i vedir mwens pouvwar lasa – ki vedir an mwayen avek 10 rounpi ou aste mwens ki ou anbitye – ki reprezant en logmantasyon dan kou lavi. An rezilta sa, ou pouvwar pou lasa avek menm kantite larzan i diminyen par lenflasyon. Par egzanp, si ou saler i 6000 rounpi e lenflasyon i ogmante sak lannen. Si lenflasyon i ogmante par 3% dan premye lannen, avek ou 6000 rounpi ou pou kapab aste mwens ki lannen avan. Si lenflasyon i kontinnyen ogmante pandan 5 an, ou saler pou kontinyelman aste mwens e mwens. I akoz sa ki lenflasyon i relye avek kou lavi. i osi pour sa ki dan bokou pei, kontra pou lanplwa pour en anlwaye, pansyon, benefis gouvènmman (tel ki lasistans sosyal) i relye avek en lendikasyon pou kou lavi - tipikman CPI (sa menm lendikater ki kalkil lenflasyon). Sa i vedir ki saler i kapab ogmante ansanm avek lenflasyon – dan bann pei avek lenflasyon ki ba sa i souvan arive sak lannen me sa i kapab ariv pli souvan dan pei avek lenflasyon ki o.

Alors menm si i annan similarite oubyen en relasyon ant pri lavi ek lenflasyon, pri lavi i vreman defini konbyen i koute pou ou mentenir serten standard lavi. Bann kalkilasyon lo kou lavi i osi kapab ganny servi pou konpar konbyen i koute pou mentenir en serten standar lavi dan diferan landrwa.

Bokou i dakor ki lenflasyon i devret ba e stab. Dan sa sans, en to lenflasyon ki ba pa vedir zero oubyen negativ – si lenflasyon i tro ba, bann Ekonomis i kwar ki i anpes en lekonomi grandi. Toudmenm, en to lenflasyon ki ba i kapab redwir lefe negativ kan kwasans lekonomi i redwir e is osi redwir risk pou lekonomi eksperyans problemm kot i mank larzan. Dan en sitiyaasyon kot i mank larzan, polisi moneter pa kapab ganny servi pour motiv lekonomi akoz bann ki annan larzan i refize pour investir akoz zot ekspekte bann levennman advers - tel ki deflasyon, oubyen lager pour arive. Bann Ekonomis i zeneralman agree ki en to lenflasyon ki o e iper enflasyon (kot lenflasyon i vreman o) i an rezilta en logmantasyon eksisiv dan larzan ki an sirkilasyon. An plis, en gran peryod kot i annan lenflasyon i an rezilta larzan ki an sirkilasyon ki pe ogmante pli vit ki lekonomi pe grandi.

Dan lemond, sa responsabilite pour kontrol lenflasyon i normalman repoz lo lotorite moneter – par egzanp labank santral. Isi sesel, i Labank Santral Sesel ki responsab pour mentenir stabilite dan pri. Pour le moman Labank Santral Sesel i servi en lapros kot i viz pou kontrol lakantite larzan dan sistenm. I fer sa par kontrol lakantite larzan ki anba son kontrol direk ki ganny define koman baz moneter ou “reserve money” an angle. Alor Labank Santral Sesel i servi en metod ki apel “reserve money targeting” - sa inn ganny dekri dan an lartik konsernan program reform oparavan ki annan en lobzektif zeneral an relasyon avek lenflasyon.

Menm si Labank Santral Sesel i kapab sirvey e enfliyans lakantite larzan ki dan baz moneter pou enfliyans larzan an sirkilasyon, ki endirekteman i annan en lenpak lo to lenflasyon, i annan lezot faktor ki enpakte lo Sesel, ki an deor kontrol Labank Santral Sesel. Sa bann faktor i enkli pri mondyal marsandiz – akoz Sesel i depann bokou lo enportasyon. Par egzanp, si pri global delwil i ogmante, pri mansandiz ki ganny anmennen sesel pou osi ogmante. An menm tan pri lezot keksoz ki ganny prodwi sesel e servis tel ki elektrisite, i osi ogmante. An plis, si pri mondyal pou en komodite, tel ki diri i ogmante, i pou enpakte lo pri diri ki ganny enporte sesel e osi lo to lenflasyon domestik.

Dan konteks sesel, CPI e tou leres kalkilasyon ki relye i ganny kolekte par Biro Statistik e bann lendikater lenflasyon ki pli resan i kapab ganny vwar lo son sit enternet. Pour plis lenformasyon lo to lenflasyon e detay lo ki pri komodite kinn sanze pandan en serten letan, bilten ki pibliye par Biro Statistik i kapab donn ou serten lenformasyon.